

ВОСКРЕСНА СЛУЖБА 3 ГЛАСА

В СУББОТУ НА ВЕЛИЦЕЙ ВЕЧЕРНИ.

На Господи, **воззвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен гласа.**

Стихиры воскресны, глас 3:

Стих: Изведи из темницы душу мою, * исповедатися Имене Твоему.

Твоим Крестом, Христе Спасе, / смерти держава разрушися, / и диаволя прелесть упразднися, / род же человеческий, верою спасаемый, / песнь Тебе всегда приносит.

Стих: Мене ждут праведницы, * дондеже воздаси мне.

Просветишася всяческая / Воскресением Твоим, Господи, / и рай паки отверзеся, / вся же тварь восхваляющи Тя, / песнь Тебе всегда приносит.

Стих: Из глубины воззвах к Тебе, Господи, * Господи, услыши глас мой.

Славлю Отца и Сына силу, / и Духа Святаго пою власть, / нераздельное, несозданное Божество, / Троицу Единосущную, / царствующую во век века.

Ины стихиры, анатолиевы, глас тойже.

Стих: Да будут уши Твои внимлюще * гласу моления моего.

Кресту Твоему честному поклоняемся, Христе, / и Воскресение Твое поем и славим. / Раною бо Твоею мы вси исцелехом.

Стих: Аще беззакония назиши, Господи, Господи, кто постоит; * яко у Тебе очищение есть.

Поем Спаса от Девы воплощагося. / Нас бо ради распятыя / и в третий день воскресе, / даруя нам велию милость.

Стих: Имене ради Твоего потерпех Тя, Господи, потерпе душа моя в слово Твое, * упова душа моя на Господа.

Сущим во аде сшед Христос благовести: / дерзайте, глаголя: / ныне победих, Аз есмь Воскресение, / Аз вы возведу, / разрушив смертная врата.

Стих: От стражи утренния до ноши, от стражи утренния, * да уповаает Израиль на Господа.

Недостойно стояще в пречистом дому Твоем, / вечернюю песнь возсылаем, / из глубины взывающе, Христе Боже: / просветивый мир тридневным воскресением Твоим, / изми люди Твоя от руки врагов Твоих, / Человеколюбче.

Таже минеи стихиры святому.

Слава святому, аще имать.

Аще ли ни, Слава, и ныне, Богородичен.

Како не дивимся Богомужному Рождеству Твоему, / О Пречестная? / Искушения бо мужескаго не приими Всенепорочная, / родила бо еси без Отца Сына плотию. / Прежде век от Отца рожденнаго без матере, / никакоже претерпевшаго изменения, / или смешения, или разделения, / но обою существу свойство цело сохраняшаго. / Темже Мати Дево Владычице, / Того моли спастися душам, / православно Богородицу исповедающих Тя.

Таже вход с кадилом. Свете Тихий: Прокимен и ектении.

На стиховне стихиры воскресны, глас 3:

Страстию Твоею, Христе, / омрачивый солнце, / и светом Твоего Воскресения, / просветивый всяческая, / приими нашу вечернюю песнь / Человеколюбче.

Стих: Господь воцарися, * в лепоту облечеса.

Живоприемное Твое Востание Господи, / вселенную всю просвети, / и Твое создание истлевшее призва. / Темже клятвы Адамовы изменшеса, вопием: / Всесильне Господи, слава Тебе.

Стих: Ибо утверди вселенную, * яже не подвижется.

Бог сый неизменен, / плотию стражда изменился еси, / Егоже тварь не терпяще / всяща зрети, / страхом прекланяшеса, / и стениячи поет Твое долготерпение: / сошед же во ад, тридневен воскресл еси, / жизнь даруя миру, / и велию милость.

Стих: Дому Твоему подобает святыня, * Господи, в долготу дней.

Да род наш от смерти Христе избавиши, / смерть претепел еси: / и тридневен из мертвых воскрес, / с Собою воскресил еси, / иже Тя Бога познавших: / и мир просветил еси. / Господи, слава Тебе.

Слава, миней, аще есть. Аще ли ни, Слава, и ныне, Богородичен:

Без семени от Божественнаго Духа, / волею же Отчею зачала еси Сына Божия, / от Отца без матере прежде век суща: / нас же ради, из Тебе без отца бывша, / плотию родила еси, / и Младенца млеко питала еси. / Темже не престай молити, / избавитися от вед душам нашим.

Таже, Ныне отпускаеши: Трисвятое. По Отче наш:

Тропарь воскресен, глас 3:

Да веселятся небесная, / да радуются земная: / яко сотвори державу / мышцею Своею Господь, / попра смертью смерть, / первенец мертвых бысть, / из чрева адова избави нас, / и подаде мірови велию милость.

Богородичен:

Тя ходатайствовавшую спасение рода нашего, / воспеваем, Богородице Дево: / плотию бо от Тебе восприятою Сын Твой и Бог наш, / Крестом восприим страсть, / избави нас от тли, яко Человеколюбец.

В СУББОТУ НА ПОВЕЧЕРИИ

Канон Пресвятей Богородице. Глас 3

Песнь 1.

Ирмос: Воды древле, / манием Божественным, / во едино сонмище совокупивый, / и разделивый море израильтеским людем, / Сей Бог наш, Препрославлен есть: / Тому Единому поим, яко прославися.

Припев: Пресвятая Богородице спаси нас.

Яко Матерь Божию Тя Духом Божественным, Отца же благоволением явльшуюся, вернии песньми чистыми венчаим, Пречистая Богоневесто: и целуем Тя пеньми со Архангелом, во спасение наше.

От ребр убо Адамовых созидается Ева, древним богозданием: от утробы же Богородицы явися Христос, сый Бог наш, вочеловечся непреложно, временен бысть Превечный.

Слава: Иже Евину утробу осуждь в печалех, родити плоды в болезни, во чрево Твое вселися Дево Чистая, сый Бог наш, плотию явися паче слова, и праматерний разреши долг.

И ныне: В нечаяния глубину впадше тяготами, прилежно зовем Богородительнице к Тебе: Владычице, помози потопляемым делом лукавых прегрешений, Тя бо Едину имамы надежду по Бозе.

Песнь 3

Ирмос: Иже от не сущих вся приведый, / Словом созидаемая, / совершаемая Духом, / Вседержителю Вышний, / в любви Твоей утверди мене.

Тя проявляше жезл Ааронов, без напоения процветший, Богородице Пречистая, без семене рождши воплощагося Бога непременно.

Божественный огонь Тя носящу, яко светильник Пречистая, провиде пророк Духом, благоухание носящую сущим в мире, и жизнь вечную.

Слава: Ко Архангелу приступим Гавриилу, радуйся, вещающе Деве песньми: Тобою бо разрешится осуждения прадедняя клятва.

И ныне: Тя Пресвятая Богородице, яко стену спасения имуще грешнии спасаемся: не презри Владычице, и не посрами наша моления.

Песнь 4

Ирмос: Положил еси к нам твердую любовь Господи, / Единородного бо Твоего Сына / за ны на смерть дал еси. / Темже Ти зовем благодаряще: / слава силе Твоей Господи.

Гору мысленную, добродетелей сень, Духом древле Аввакум боговидно тя виде, проповедаше Пречистая: яко от юга пришедша от Тебе Слово плоть приемша.

Гору Тя велию несекому Даниил Духом виде, не новосекому являя чистоту девства Твоего Владычице: от неяже камень усечеса, Христос Слово, лести низлагая идольския.

Слава: Гору Тя Давид чудну и тучну прорече: Единородный бо от Отца Сын в Тя благоволи Чистая, вселитися воплощаемь. Тем Ти, радуйся, Духом зовем.

И ныне: Вся благая и теплая заступница сущи грешником и смиренным, Богородительнице Пречистая Владычице, от бед, и скорбей, и грехов спасай рабы Твоя.

Песнь 5

Ирмос: Яко виде Исаиа образно / на престоле превознесена Бога, / от ангел славы дориносима, / О окаянный, вопияше, аз: / провидех бо воплощается Бога, / Света Невечерня, и миром владычествующа.

Израсти жезл иисеев цвет неувядаемый, Дева Мария Бога Безначального, без семени, от Духа Божественного и Отца, царства державная языческая обладавшего, на Негоже языцы уповаша.

Князь мирный прииде на престол Давидов, царствуя из Тебе Богородице Бог воплощаемь: О чудо! И брань разреш, потче князи моавитския, и Тебе рождшую Царицу показа.

Слава: Непорочную Твою доброту, от Неяже Христос в плоть облечеса без семени Дево, Исаиа являя, зовет вопия: Господь славы грядет на облаце легце, и прелести тьму отгоняя, просветит нас.

И ныне: От Духа Свята заченши Слово Единосущное Отцу, Дево Сие родила еси во дву Естеству суща, Бога совершенна и совершенна Человека: Егоже верою почитаем плотское явление.

Песнь 6

Ирмос: Бездна последняя грехов обыде мя, / и исчезает дух мой: / но прострый Владыко / высокую Твою мышцу, / яко Петра мя Управителю спаси.

Одр Тя песньми премудрый преднаписует Всепетая, на Немже почи Бог воплощаемь во Ипостаси из Тебе, и прослави Тя, несмесно раждаемь.

Бысть Слову яко избранная, Дево Всепетая, избранная одежда: яко порфиру Божественную из Тебе плоть прием воцарися, боголепно одеявся.

Слава: Бысть соединения Божественнаго вместилище, Богоневесто, злата светлейши: Тобою бо бысть Бог яко человек, и беседова человеком Бог, яко человек.

И ныне: Умертви нечествующих в Тя, Дево Всепетая, злобы ересь: яко завистию тают преславное Твоего Образа видяще подобие.

Господи помилуй, **трижды.**

Слава, и ныне:

Седален, глас 3:

От теплоты веры вопию Ти Богородице, / недостойными усты, и скверным сердцем: / спаси мя погруженнаго грехами, / ущедрю умерщвленнаго отчаянием, / да зову Ти спасаемь: / радуйся Дево, христианом помощнице.

Песнь 7

Ирмос: Прежде образу златому, / персидскому чтилищу, / отроцы не поклоняшася, / трие поюще посреде печи: / отцев Боже благословен еси.

Купина и пламень сообразне совокупльшеся, и нетленна обоя явльшеся, Тя Дево ясно проявляют: ибо родила еси Бога, и девствуеши.

Руно и роса Гедеону во изменении образуема, рождество Твое предпишут: Ты бо Едина Божественное Слово носиши во чреве, яко дождь, Дево Мати.

Слава: Греха моего огонь паче геенскаго, пламень мне содевает, сий угаси Чистая, Твоею милостию, покаянием мя ко свету наставляющи.

И ныне: Твоего зрака явление Богородице Пречистая, чтуще яко первый образ Тя, заступницу присно, и покров благоприменен к Богу имамы вси.

Песнь 8

Ирмос: Вавилонская печь отроки не опали, / ниже Божества огонь Деву растли. / Тем со отроки вернии возопиим: / благословите дела Господня Господа.

Тя Отец изволи Невесту Неискусобрачную, яко крин пресветлый посреде терния обрет, светлостию доброты блистающую Духом Божественным, Сыну в жилище.

Святейшую вышних сил Деву Пренепорочную, без разсуждения славлю яве: Творца бо сих во чреве понесе, несмесным соединением плоть приемша от Тебе.

Слава: Девство некрадомо Дево сохраниши, Мати явилася еси Сына Божия воистинну, Отца благоволением Невеста бывши, и приятелище славы Духа нетленно.

И ныне: Иже естеством Невещественный Бог и Невидимый, просто и неизреченно паче естества раждается Человек от Святыя Девы, сугуб зримь во Единой Ипостаси, в Нейже видимь есть писаньми.

Песнь 9

Ирмос: Новое чудо и боголепное: / Девическую бо дверь затвореную / яве проходит Господь, наг во входе, / и плотоносец явился во исходе Бог, / и пребывает Дверь затворена. / Сию неизреченно яко Богоматерь величаем.

Святаго корене Свят Плод: неплодныя бо, освященныя законом Божиим Отчим, неувядаемую жизнь совершающую Богородица Отроковица процвете: и радуется Анна, приемши Отроча в старости, Божию Матерь, Юже славим.

Ново Рождество и боговидно Святаго Твоего и Богоноснаго чрева Чистая: в нем бо написася образ в человека Отчим перстом, Сын воплощся Свят Духом Святым. Егоже несмесно яко Бога и Человека величаем.

Слава: Вопиет всяк суд на мя: дела бо греховных деяний вопль содевают мне претяще, и душа вся весть, имиже препрена будет, и трепещет пламене геенскаго: от негоже прежде конца, молитвами Твоими избави мя Владычице.

И ныне: По Рождестве явился нетленна Чистая: неизменно бо Зиждителя всех плотию, Богородице, родила еси Человека паче естества, Отча Существа не отступльша, и абие пребысть Дева Духом Божественным. Темже славяще Тя, песнь совершаем.

Таже: Достойно есть: **Трисвятое. Кондак воскресен, и отпуст.**

НА ПОЛУНОЩНИЦЕ

Канон ко Святей и Живоначальной Троице, егоже краестрочие: Хвалю Троице Тя, Едино Богоначалие. Глас 3.

Творение Митрофаново

Песнь 1

Ирмос: Воды древле, / манием Божественным, / во едино сонмище совокупивый, / и разделявый море израильтеским людем, / Сей Бог наш, Препрославлен есть: / Тому Единому поим, яко прославися.

Припев: Пресвятая Троице Боже наш, слава Тебе.

Непостижимое Едино Господоначалие, и Едино Троическое Богоначалие, Трисияннаго Света Твоего мя сподоби: яко да воспую Тя, певаемое непрестанно трисвятыми песньми, ангельскими усты.

Священно невестественнии вси чинове поют, яко творительную вину, Единственную, Трисветлую, Начальнейшую яве: Юже согласно поем, и человеческая множества, и верно славим бренными усты.

Слава: Ум, и Слово, и Дух, богословцы приличне, и знаменительне Тебе наричут: безстрастно Рождество от Нерожденнаго Отца, Сыну знаменующу, Боже Единоначальне всех, вкупе и Духа Божественнаго исхождение.

И ныне: Яко Человеколюбец естеством, человеческое существо прием Божий Слове, Троичный возсиял еси, Единоначальнейший свет Единого Божества, Препрославленную всем показавый, рождшую Тя Деву Пречистую.

Песнь 3

Ирмос: Иже от не сущих вся приведый, / Словом созидаемая, / совершаемая Духом, / Вседержителю Вышний, / в любви Твоей утверди мене.

Утроити древле воду повелев Илия на поленах, образно прояви Троичную Ипостась, Единственного Божия Господоначалия.

Тленное естество поет Тя земнородных, Единого и Трисветлаго Создателя Неизменнаго, и вопиет Ти Владыко: всеразличнаго мя пременения избави, и спаси мя.

Слава: Равно вещающе словесем пророческим, славных апостол же и проповедник веры, равнодетельную Тя Троицу славословим вернии, Боже всех.

И ныне: С престола высокога сниде Христос, человека возвышая, яко Человеколюбец, Тобою Пречистая, и Трисолнечный Свет всем возсия.

Господи помилуй, трижды

По 3-й песни седален, глас 3.

Подобен: Красоте девства:

Пресущественный и Едине Господи Христе, / и рождение Преприначальнаго Отца, / и Душе Божественнейший, / помилуй рабы Твоя: / вси бо согрешихом, / но от Тебе не отступихом. / Темже молим Тя Триипостасне Господи, / яко имеяй власть, / создание Твое спаси от всякаго обстояния.

Слава, и ныне, Богородичен:

Пресущественный Бог и Господь / из Тебе воплотися за благодать, / Еже по нам осуществовавыйся, / и пребыв еже бе. / Темже и Богочеловека Сего почитающе Всечистая, / Тя Неискусобрачную Богородицу проповедуем, / славяще превелие чудо Твоего безсеменнаго Рождения.

Песнь 4

Ирмос: Положил еси к нам твердую любовь Господи, / Единороднаго бо Твоего Сына / за ны на смерть дал еси. / Темже Ти зовем благодаряще: / слава силе Твоей Господи.

Отрасль сугуб от Отца, яко от корене прозябе Сын, и Дух Правый, соестественна прозябения, и богосажденна, и цвети Собезначальнии: яко трием быти светом Божества. **[Дважды]**

Слава: Множества умных существ, непрестанно поют Тя, недомыслимаго Бога, с нимиже мы славим, глаголюще: Троице Пресущная, Твоя рабы спаси, яко Человеколюбец.

И ныне: Распалил еси нас в любовь Твою, Многомилостиве Слове Божий, Иже нас ради воплощься непреложне, и Трисветлое Едино Божество тайно научив: темже Тя славим.

Песнь 5

Ирмос: Яко виде Исаиа образно / на престоле превознесена Бога, / от ангел славы дориносима, / О окаянный, вопияше, аз: / провидех бо воплощаема Бога, / Света Невечерня, и миром владычествующа.

Единаго Господоначальника, образно яко виде Исаиа Бога, в Трех Лицах славословима пречистыми гласы серафим, послан бысть проповедати абие Трисветлое Существо, и Единицу Трисолнечную. **[Дважды]**

Слава: Яже всех невидимых и видимых естество, от не сущих прежде составляющая, Единице Трисолнечная, Иже Единаго Тя Бога верно воспевающих от всяких искушений избавльши, Твоя славы сподоби.

И ныне: Невестник светоносен и чист Дево, бывший Божий, воспеваем Тя любовию, и блажим: из Тебе бо родися Христос, в существах и хотениях сугубых, Иже Един от Троицы и славы сый Господь.

Песнь 6

Ирмос: Бездна последняя грехов обыде мя, / и исчезает дух мой: / но прострый Владыко / высокую Твою мышцу, / яко Петра мя Управителю спаси.

Пресельник сый Авраам, сподобися образно восприяти Единственного убо Господа в Трех Ипостасех, пресущественна мужескими же зраки. **[Дважды.]**

Слава: Направи сердца Твоих рабов к Свету Непроступному, О Трисолнечне Господи, и Твоя славы сияние подаждь душам нашим, во еже облистаемым быти Твоею добротою неизреченною.

И ныне: Отверзи мне двери Света рождаемого от утробы Твоя Пречистая: да зрю Трисветлую лучу Божества, и славлю Тя Всесветлую Владычицу.

Господи помилуй, **трижды.**

По 6-й песни седален, глас 3:

Подобен: Божественная веры:

Божественнаго Естества Единосущнаго / Трисолнечную поем державу, / и трисвятыми гласы возопиим: / Свят еси Отче Пребезначальный, / Свят еси Сыне Собезначальный, / и Душе Святой, Едине Нераздельный Боже наш, / и всех Творче Человеколюбче.

Слава, и ныне, Богородичен:

Подобен:

Чудо превелие: / како содержася Невместимый / во чреве Твоем и воплотися, / и явися, яко Человек, / не претерпевый смешения / или разделения Божественнаго / и Непреложнаго Божества, / Отроковице Всечистая: / темже Богородицу / Тя верно проповедуем присно и славим.

Песнь 7

Ирмос: Якоже древле / благочестивыя три отроки оросил еси / в пламени халдейстем, / светлым Божества огнем и нас озари, / Благословен еси взывающыя, Боже отец наших.

Храм мя покажи Твоего Божества Владыко, Трисианнаго, Весь Светел: греховнаго омрачения лютаго и страстей вышша, светодательными Твоими сиянии, Боже отец наших благословен еси.

Божества зрак Един возвещаем, в Триех Ипостасных и отдельных свойствах, Отца, и Сына, и Духа: благословен еси зовуще, Боже отец наших.

Слава: Явися Аврааму Бог Триипостасный у дуба древле мамврийскаго, о страннолюбии мзду Исаака воздая за милость: Егоже и ныне славим, яко Бога отец наших.

И ныне: Явися на земли, быв Человек Вседетель, боголепно от девственнаго и пречистаго Твоего чрева, и нас обожи, Благословенная Всечистая, Богородице Пречистая.

Песнь 8

Ирмос: Нестерпимому огню соединившися, / богочестия предстояще юноши, / пламенем же невредени, / Божественную песнь пояху: / благословите вся дела Господня Господа, / и превозносите во вся веки.

Безначальна Отца яко от корене, Слово, и Дух Собезначальне суща: яко отрасли Пресущественнаго Богоначалия показаша Троицы славу единую и силу: Юже поем вси вернии во веки. **[Дважды]**

Слава: Управляеши Твоими светлостями чины небесныя, воспевати немолчно трисвятыми песнями Божественными, Отче, Слове сообразне, и Душе, Трисветлую Державу и Равномощную. Темже Тя поем во вся веки.

И ныне: Проречения пророческая, Твое Рождество издалеча видевше Богородице, восхваляху, яко без семене, и паче естества рождагося Владычице: и согласно Сего поем, яко Господа, и превозносим во вся веки.

Песнь 9

Ирмос: Новое чудо и боголепное: / Девическую бо дверь затвореную / яве проходит Господь, наг во входе, / и плотоносец явися во исходе Бог, / и пребывает Дверь затворена. / Сию неизреченно яко Богоматерь величаем.

Видети славу Трисиянную, боговиднии безплотных чинове яве, восходити крилы желают горе: но говеют зело неприступнаго света, и песни непрестанно вопиют: с ними согласно Единственная Троице Тя славим. **[Дважды]**

Слава: Несытою любовию и иже на земли, умную душу от Тебе приемше, и словесную, Тебе поим Владыко, Боже всех, Единственное Естество воистинну, и Троичное Лицы, от всего сердца. Темже щедре яко многомилостив, нас ущедри.

И ныне: Храм мя покажи Единачальнаго, и Трисветлаго Твоего Богоначалия, Световиден, чисте служити Тебе Зиждителю всех, и неизреченную Твою славу умно зрети: молитвами Единя Богородицы, Юже достойно яко Преславную величаем.

Таже троичны Григория Синаита. Достойно есть: И прочее полунощницы.

НА УТРЕНИ

По шестопсалмии Бог Господь, на глас 3 ый глаголем тропарь воскресный, дважды, и Богородичен единожды, писаны на велицей вечерни. Таже обычное стихословие псалтиря.

По 1-м стихословии, седальны воскресны, глас 3:

Христос от мертвых воста, / начаток усопших: / перворожден твари, / и Содетель всех бывших, / истлевшее естество рода нашего в Себе Самом обнови. / Не ктому смерти обладаеши: / ибо всех Владыка державу твою разруши.

Стих: Воскресни Господи Боже мой, да вознесется рука Твоя, * не забуди убогих Твоих до конца.

Плотию смерти вкусив Господи, / горесть смерти пресекл еси востанием Твоим, / и человека на ню укрепил еси, / первыя клятвы одоление призывая: / Защитниче жизни наша Господи, слава Тебе.

Слава, и ныне, Богородичен:

Красоте девства Твоего, / и пресветлой чистоте Твоей, / Гавриил удивився, вопияше Ти Богородице: / кую Ти похвалу принесу достойную; / что же возименую Тя; / недоумеваю и ужасаюся. / Темже яко повелен бых, вопию Ти: / радуйся Благодатная.

По 2-м стихословии седальны воскресны, глас 3

Подобен: Красоте девства:

Неизменнаго Божества, ивольныя страсти Твоя Господи, / ужася ад, в себе рыдаше: / трепещу плоти Нетленная Ипостаси, / вижду Невидимаго, / тайно борюща мя. / Темже и ихже держу, зовут: / слава Христе воскресению Твоему.

Стих: Исповеся Тебе Господи всем сердцем моим, * повем вся чудеса Твоя.

Непостижимое распятия, / и несказанное востания / богословствуем вернии, / таинство неизреченное: / днесь бо смерть и ад пленися, / род же человеческий в нетление облечеса. / Тем благодаряще вопием Ти: / слава Христе востанию Твоему.

Слава, и ныне, Богородичен:

Непостижимаго и Неописаннаго, / Единосущнаго Отцу и Духови, / во утробу Твою тайно вместила еси Богородице, / Едино и Несмесно от Троицы Божество: / познахом рождество Твое в мире славити. / Темже и благодарственно вопием Ти: / радуйся Благодатная.

Таже, Блажени непорочнии:

Посем тропари: Ангельский собор:

Ипакои, глас 3:

Удивляя видением, орошая глаголании, / блистаяся ангел мироносицам глаголаше: / что живаго ищите во гробе; / воста истощивый гробы. / Тли Пременителя разумеите Непременнаго. / Рцыте Богови: коль страшна дела Твоя, / яко род спасл еси человеческий!

Степенны: антифон 1, глас 3, стихи повторяюще:

Плен Сионь Ты изъял еси / от Вавилона: / и мене от страстей к животу / привлецы Слове.

В юг сеюции слезами божественными, / жнут класы радостию присноживотия.

Слава: / Святому Духу всякое благодарие, / якоже Отцу и Сыну сооблищает, / в Немже вся живут / и движутся.

И ныне, тойже.

Антифон 2:

Аще не Господь созиждет дом добродетелей, / всеу труждаемся: / душу же покрывающую, / никтоже наш разорит град.

Плода чревна / Духом сынотвореное Тебе Христу / якоже и Отцу, / святии всегда суть.

Слава: / Святым Духом / прозрится всякая святыня, премудрость: / осуществляет бо всякую тварь: / Тому послужим, Бог бо, яко Отцу же и слову.

И ныне, тойже.

Антифон 3:

Боящиеся Господа / блажени, / в пути ходяще заповедей: / снут бо животное всеплодие.

Окрест трапезы Твоя возвеселися, / зря Твоя Пастыреначальниче / исчадия, / носяща ветви благоделания.

Слава: Святым Духом всякое богатство славы, от Негоже благодать, и живот всякой твари: со Отцем бо воспеваемъ есть, и с Словом.

И ныне, тойже.

Прокимен, глас 3: Рцыте во языцех, яко Господь воцарися, ибо исправи вселенную, яже не подвижится.

Стих: Воспойте Господеву песнь нову.

Всякое дыхание:

Евангелие утреннее рядовое.

Воскресение Христово видеvше, / поклонимся Святому Господу Иисусу, / Единому Безгрешному. / Кресту Твоему покланяемся Христе, / и Святое Воскресение Твое поем и славим: / Ты бо еси Бог наш, / разве Тебе иного не знаем, / Имя Твое именуем. / Приидите вси вернии, / поклонимся Святому Христову воскресению: / се бо прииде Крестом радость всему миру. / Всегда благословяще Господа, / поем Воскресение Его: / распятие бо претерпев, / смертью смерть разруши.

Псалом 50: Помилуй мя Боже:

Слава: / Молитвами апостолов, / Милостиве, очисти / множества согрешений наших.

И ныне: / Молитвами Богородицы, / Милостиве, очисти / множества согрешений наших.

Таже, глас 6: Помилуй мя Боже / по велицей милости Твоей, / и по множеству щедрот Твоих / очисти беззаконие мое.

Посем стихира:

Воскрес Иисус от гроба, / якоже прорече, / даде нам живот вечный, / и велию милость.

Спаси Боже люди Твоя:

И возглас: Милостию и щедротами и человеколюбием:

Каноны: воскресный на 4: крестовоскресный на 3: и Богородичен на 3: Минеи на 4. Аще же празднуется святыи, на 6: крестовоскресный на 2, и Богородицы на 2.

Канон воскресный. Глас 3.

Песнь 1

Ирмос: Воды древле, / манием Божественным, / во едино сонмище совокупивый, / и разделивый море израильским людем, / Сей Бог наш, Препрославлен есть: / Тому Единому поим, яко прославися.

Припев: Слава Господи святому Воскресению Твоему.

Иже землю осудив, преступльшему *~потом изнести плода терние~, от терния венец из руки законопреступныя, Сей Бог наш, плотски приемый, клятву разрушил есть: яко прославися.

Припев: Слава Господи святому Воскресению Твоему.

Победитель и Одолетель смерти, иже смерти убоявся, явися: страстную бо плоть одушевленную прием, Сей Бог наш, и брався с мучителем, вся совоскреси: яко прославися.

Припев: Пресвятая Богородице спаси нас.

Богородичен: Истинную Богородицу вси языцы славят Тя, без семене рождшую: сошед бо во утробу освященную Твою, Сей Бог наш, Еже по нам осуществовася, Бог же и Человек из Тебе родися.

Ин канон, крестовоскресный, Глас 3

Песнь 1

Ирмос: Песнь новую поим людие:

Припев: Слава Господи Кресту Твоему честному и Воскресению.

Род человекъ поработен мучителем грехолюбным, кровию Божественною Христос испуки, и обоготворив обновил есть: яко прославися.

Припев: Слава Господи Кресту Твоему честному и Воскресению.

Яко убо смертен, смерти хотяй, Иже животу сокровищник, Христос вкуси: а яко безсмертен сый естеством, мертвыя оживотворил есть: яко прославися.

* ~пота изнести плод терния~

Ин канон Пресвятей Богородице,

егоже краестрочие: Пою третье пение Тебе Богородице.

Глас 3

Песнь 1.

Ирмос: Песнь новую поим людие:

Припев: Пресвятая Богородице спаси нас.

Колено приклоняет всяко естество небесных Дево, воплощемуся из Тебе, со земными же достолепно преисподняя: яко прославися.

Припев: Пресвятая Богородице спаси нас.

О примирений Яже в Тебе: благих бо независтно Податель, яко Бог Духа Божественнаго подавый нам, плоть от Тебе Отроковице прият: яко прославися.

Катавасия: Отверзу уста моя:

Песнь 3

Ирмос: Иже от не сущих вся приведый, / Словом созидаемая, / совершаемая Духом, / Вседержителю Вышний, / в любви Твоей утверди мене.

Припев: Слава Господи святому Воскресению Твоему.

Крестом Твоим постыдися нечестивый, содела бо яму, юже ископа, впаде: смиренных же вознесся Христе рог, во Твоем воскресении.

Припев: Слава Господи святому Воскресению Твоему.

Благочестия проповедание языком, яко вода покры моря Человеколюбче: воскрес бо от гроба, Троический открыл еси свет.

Припев: Пресвятая Богородице спаси нас.

Богородичен: Преславная глаголана быша о Тебе, Граде Одушевленный присно Царствующаго: Тобою бо Владычице, сущым на земли Бог спожил есть.

Ин, Кресту :

Ирмос: Лук сокрушил еси вражий:

Припев: Слава Господи Кресту Твоему честному и Воскресению.

Очищение Пречистый Кресте, идольских явился еси Ты нечистот: яко Иисус Пребожественный, на Тебе руце распростерл еси.

Припев: Слава Господи Кресту Твоему честному и Воскресению.

Да вси вернии живоприемный гробе, тебе поклоняемся: погребесе бо в тебе и воста Христос воистинну Бог наш.

Ин, Богородице :

Ирмос: Лук сокрушил еси вражий:

Припев: Пресвятая Богородице спаси нас.

Жезл из корене Иессеова, пророчески прозябши Дева, цвет Тя Христе, возсия нам: Свят еси Господи.

Припев: Пресвятая Богородице спаси нас.

Да Божественному причастию земнородныя соделаеши, от Девы плоть нашу, Ты обнищал еси, прием: Свят еси Господи.

Песнь 4

Ирмос: Положил еси к нам твердую любовь Господи, / Единороднаго бо Твоего Сына / за ны на смерть дал еси. / Темже Ти зовем благодаряще: / слава силе Твоей Господи.

Припев: Слава Господи святому Воскресению Твоему.

Язвы Христе, и раны милостивно подъял еси, досаду по ланитома ударений терпя, и долготерпеливне оплевания нося, имиже соделал еси мне спасение: слава силе Твоей Господи.

Припев: Слава Господи святому Воскресению Твоему.

Телом смертным животе, смерти причастился еси, страсти ради нищих, и въздыхания убогих Твоих: и растлив тлеющаго Препрославленне, всех совоскресил еси, яко прославися.

Припев: Пресвятая Богородице спаси нас.

Богородичен: Помяни Христе, еже стяжал еси стадо страстию Твоею: Препрославленные Твоя Матере милостивныя мольбы прием, и посетив озлобленное, избави силою Твоею Господи.

Ин, Кресту :

Ирмос: Странна и неизреченна:

Припев: Слава Господи Кресту Твоему честному и Воскресению.

Создавый по образу Твоему Человеколюбче человека, и умерщвлена грехом преступления ради, распеня на лобнем, спасл еси.

Припев: Слава Господи Кресту Твоему честному и Воскресению.

Мертвья убо, ихже пожре смерть, отдаде: разорися же и адово тлетворное царство, воскресу Ти из гроба Господи.

Припев: Пресвятая Богородице спаси нас.

Богородичен: Марие Чистая, Златая Кадильнице, неслиянно яко Един от Троицы в Тя сошед, воплощься Бог Слово, мир облагоухал еси.

Ин, Богородице :

Ирмос: Странна и неизреченна:

Припев: Пресвятая Богородице спаси нас.

Иже поставивый горы Владыко, мерилом Божественнаго разума, отсечен еси от Девы Камень, кроме рук: силе Твоей слава Человеколюбче.

Припев: Пресвятая Богородице спаси нас.

Недугующее исцелил еси наше естество Владыко, скорейшую из Девы сию соединив цельбу, Твое Пречистое Слово Божество.

Припев: Пресвятая Богородице спаси нас.

Часть моя еси Господи, и наследие желанное, соединивый мя из Девы, Слове, Ипостаси Твоей, плотию быв ипостась.

Песнь 5

Ирмос: К Тебе утреннюю всех Творцу, / преимуществу всяк ум мирови, / зане свет повеления Твоя: / в нихже настави мя.

Припев: Слава Господи святому Воскресению Твоему.

Судии неправедному, еврейскою завистию предан быв Всевидче, и всей праведне судяй земли, Адама древняго избавил еси осуждения.

Припев: Слава Господи святому Воскресению Твоему.

Твой мир церквам Твоим Христе, непобедимую силою Креста Твоего, из мертвых воскресый подаждь, и спаси души наша.

Припев: Пресвятая Богородице спаси нас.

Богородичен: Скиния Святая, и пространнейши небес, яко Иже во всей твари Невместимаго Слова Божия приемши, Едина явилася еси Приснодево.

Ин, Кресту :

Ирмос: На земли Невидимый явился еси, / и человеком волею сожил еси / Непостижимый, / и к Тебе утреннюю, / воспеваем Тя Человеколюбче.

Припев: Слава Господи Кресту Твоему честному и Воскресению.

Копием в ребро Твое, О Христе мой, прободен быв, от ребра человека созданную, губительства всем человеком бывшую ходатаицу, клятвы свободил еси.

Припев: Слава Господи Кресту Твоему честному и Воскресению.

Равен Отцу по Существо сый, священный храм Пречистаго Твоего и Всечестнаго телесе, из мертвых воскресил еси Христе Спасе наш.

Ин, Богородице :

Ирмос: На земли Невидимый явился еси, / и человеком волею сожил еси / Непостижимый, / и к Тебе утреннюю, / воспеваем Тя Человеколюбче.

Припев: Пресвятая Богородице спаси нас.

Слово Божие Сын Твой Дево, Содетель Адама первозданнаго, не создание, аще и плоть одушевлену Себе из Тебе создал есть.

Припев: Пресвятая Богородице спаси нас.

Равен Отцу Сын Твой Дево, Слово Божие, Ипостась совершенна во двою естеству, Иисус Господь, Бог совершен и Человек.

Песнь 6

Ирмос: Бездна последняя грехов обыде мя, / и исчезает дух мой: / но прострый Владыко / высокую Твою мышцу, / яко Петра мя Управителю спаси.

Припев: Слава Господи святому Воскресению Твоему.

Бездна милости и щедрот обыде мя, благоутробным снитием Твоим: воплощься бо Владыко, и быв в рабии зраце обожил еси, с Собою сопрославив.

Припев: Слава Господи святому Воскресению Твоему.

Умерщвление подъят умертвитель, умерщвленого оживленно видя: Твоего воскресения сии суть Христе образы, и страсти Твоя Пречистыя победительная.

Припев: Пресвятая Богородице спаси нас.

Богородичен: Пречистая, яже Едина Создателю и человеком, паче ума исходатаившая, Сына Твоего милостива прегрешшым рабом Твоим, и поборника быти, помолися.

Ин, Кресту :

Ирмос: Селения Иона, / еже в преисподнем аде, / естественный образ быв, вопияше: / возведи от тли живот мой, / Человеколюбче.

Припев: Слава Господи Кресту Твоему честному и Воскресению.

Ранами Ты искусився, от ада ураненных, страстию Креста совоскресил еси. Темже Ти зову: возведи от тли живот мой, Человеколюбче.

Припев: Слава Господи Кресту Твоему честному и Воскресению.

Отверзаются Ти Христе страхом врата адова, сосуды же вражия восхищаются: темже Тя жены сретоша, вместо печали радость приимша.

Ин, Богородице :

Ирмос: Селения Иона, / еже в преисподнем аде, / естественный образ быв, вопиаше: / возведи от тли живот мой, / Человеколюбче.

Припев: Пресвятая Богородице спаси нас.

Воображается еже по нам, от Нетленных Девы, Иже образом неразлучный, образом быв и вещь, не преложся Божеством Человек.

Припев: Пресвятая Богородице спаси нас.

Бездны грехов, и бури страстей Пречистая избави мя: еси бо пристанище, и бездна чудес, верую притекающим к Тебе.

Кондак, глас 3.

Подобен: Дева днесь:

Воскресл еси днесь из гроба щедре, и нас возвел еси от врат смертных: днесь Адам ликует, и радуется Ева, вкупе же и пророцы с патриархи воспевают непрестанно Божественную державу власти Твоя.

Икос: Небо и земля днесь да ликовствуют, и Христа Бога единомудренно да воспевают, яко узники от гробов воскреси. Срадуется вся тварь, приносящи достойныя песни Создателю всех, и Избавителю нашему: яко человеки из ада днесь яко Жизнодатель совозвед, на небеса совозвышает, и низлагает вражия возношения, и врата ада сокрушает Божественною державою власти Своя.

Песнь 7

Ирмос: Якоже древле / благочестивыя три отроки оросил еси / в пламени халдейстем, / светлым Божества огнем и нас озари, / Благословен еси взывающыя, Боже отец наших.

Припев: Слава Господи святому Воскресению Твоему.

Раздрася церковная светлая катапетасма, в распятии Содетеля, сокровенную в Писании являющи верным истину, благословен еси, зовущим, Боже отец наших.

Припев: Слава Господи святому Воскресению Твоему.

Прободенным Твоим ребром, каплями Боготочныя Животворящая Крове Христе, смотрительно каплющая на землю, сущих от земли возсоздал еси, благословен еси, зовущих, Боже отец наших.

Припев: [Благословим Отца и Сына и святого Духа Господа.](#)

Троицен: Духа Благаго со Отцем прославим, и с Сыном Единородным, Едино в Трех вернии чтуще Начало, и Едино Божество: благословен еси, зовуще, Боже отец наших.

Ин, Кресту :

Ирмос: Гордый мучитель, / но детей бысть игралище: / якоже бо персть поправше / седмеричный пламень, пояху: / благословен еси Господи, Боже отец наших.

Припев: [Слава Господи Кресту Твоему честному и Воскресению.](#)

Не проста солнце на кресте висяща человека, но Бога воплощенна зря помрачается. Емуже и поем: благословен еси Господи, Боже отец наших.

Припев: [Слава Господи Кресту Твоему честному и Воскресению.](#)

Крепкаго Божеством прием ад страшливый, нетления Подателя, души праведных вопиющыя избева: благословен еси Господи, Боже отец наших.

Припев: [Пресвятая Богородице спаси нас.](#)

Богородичен: Сокровище многоценное благословения явилася еси Пречистая, чистым сердцем Тебе исповедающим Богородительницу: ибо из Тебе воплотися Бог отец наших.

Ин, Богородице :

Ирмос: Гордый мучитель, / но детей бысть игралище: / якоже бо персть поправше / седмеричный пламень, пояху: / благословен еси Господи, Боже отец наших.

Припев: [Пресвятая Богородице спаси нас.](#)

Иже славы Господь, и держай горния силы, Иже со Отцем седяй, девственныма рукама носимь: благословен еси Господи, Боже отец наших.

Припев: [Пресвятая Богородице спаси нас.](#)

Яра смерть, но сию Тебе беседовавшую погубил еси, от Девы Богоипостасная плоть быв: благословен еси Господи, Боже отец наших.

Припев: [Пресвятая Богородице спаси нас.](#)

Богородицу вси Тя Бога рождшую уведехом, Единаго бо от Троицы воплотившагося из Тебе родила еси: благословен Пречистая, Плод Твоего чрева.

Песнь 8

Ирмос: Нестерпимому огню соединившися, / богочестия предстояще юноши, / пламенем же невредени, / Божественную песнь пояху: / благословите вся дела Господня Господа, / и превозносите во вся веки.

Припев: Слава Господи святому Воскресению Твоему.

Раздрася церковная светлость, егда крест Твой водрузися на лобнем, и тварь преклоняшеся страхом, воспеваючи: благословите вся дела Господня Господа, пойте и превозносите Его во веки.

Припев: Слава Господи святому Воскресению Твоему.

Воскресл еси Христе из гроба, и падшаго прельщением, древом исправил еси Божественною силою, зовуща и глаголюща: благословите вся дела Господня Господа, пойте и превозносите Его во веки.

Припев: Пресвятая Богородице спаси нас.

Богородичен: Храм Божий явилася еси Вместилище одушевленное, и Ковчег: Творца бо человеком, Богородительнице Пречистая, примирила еси, и достойно вся дела поем Тя, и превозносим во вся веки.

Ин, Кресту :

Ирмос: Вещественнаго огня пламень / невещественным увядиша, / богозримии отроцы, и пояху: / благословите вся дела Господня Господа.

Припев: Слава Господи Кресту Твоему честному и Воскресению.

Слово нестрастное, безстрастно убо Божеством, страждет же плотию Бог, Емуже и поем: благословите вся дела Господня Господа, пойте и превозносите Его во веки.

Припев: Слава Господи Кресту Твоему честному и Воскресению.

Уснувший убо яко смертен, воскресл еси яко Безсмертен Спасе, и спасаеши от смерти поющих: благословите вся дела Господня Господа, пойте и превозносите Его во веки.

Припев: Благословим Отца и Сына и святаго Духа Господа.

Троицен: Служим благочестно Триипостасному Божеству, соединяему неизреченно, и поем: благословите вся дела Господня Господа, пойте и превозносите Его во веки.

Ин, Богородице :

Ирмос: Вещественнаго огня пламень / невещественным увядиша, / богозримии отроцы, и пояху: / благословите вся дела Господня Господа.

Припев: Пресвятая Богородице спаси нас.

Чины умныя яко Мати превозшла еси, и близ Бога бывши: благословим Благословенная Дево, рождество Твое, и превозносим во вся веки.

Припев: Пресвятая Богородице спаси нас.

Доброту естественную, краснейшу показала еси, облиставающую плоть Божества. Благословим Благословенная Дево, рождество Твое, и превозносим во вся веки.

Таже, песнь Богородицы: Величит душа моя Господа: **с припевом:** Честнейшую херувим:

Песнь 9

Ирмос: Новое чудо и боголепное: / Девическую бо дверь затвореную / яве проходит Господь, наг во входе, / и плотоносец явился во исходе Бог, / и пребывает Дверь затворена. / Сию неизреченно яко Богоматерь величаем.

Припев: Слава Господи святому Воскресению Твоему.

Страшно есть зрети Тебе Творца на древе воздвигена Слове Божий, плотски же страждуща Бога за рабы, и во гробе бездыханна лежаща, мертвыя же из ада разрешивша: темже Тя Христе, яко Всесильна величаем.

Припев: Слава Господи святому Воскресению Твоему.

Из тли смертныя спасл еси Христе праотцы, положен быв во гробе мертв, и живот процвел еси, мертвыя воскресив, руководив естество человеческое ко свету, и в Божественное облек нетление. Темже источника Тя света присно живаго величаем.

Припев: Пресвятая Богородице спаси нас.

Богородичен: Храм и Престол явилася еси Божий, воньже вселися Иже в вышних сый, рождейся неискусомужно Всечистая, плоти Твоя не отверз всячески врата. Темже непрестанными Чистая молитвами Твоими, языки варварския скоро до конца покори.

Ин, Кресту :

Ирмос: Сладкою Пречистаго Твоего рождества / стрелою уязвлени Чистая, / Твоей достожеланней доброте дивящися, / песнями ангельскими достойно Тя, / яко Матерь Божию величаем.

Припев: Слава Господи Кресту Твоему честному и Воскресению.

Честь человеком от безчестныя смерти всем источил еси: еже распятием Твоим Спасе вкусив, существом смертным нетление мне даровал еси Христе, яко Человеколюбец.

Припев: Слава Господи Кресту Твоему честному и Воскресению.

Спасл мя еси воскрес из гроба Христе: воскресл же еси, и Отцу привел еси Твоему Родителю: одесную же Его спосадил еси за благоутробие милости Твоя Господи.

Ин, Богородице :

Ирмос: Сладкою Пречистаго Твоего рождества / стрелою уязвлени Чистая, / Твоей достожеланней доброте дивящися, / песнями ангельскими достойно Тя, / яко Матерь Божию величаем.

Припев: Пресвятая Богородице спаси нас.

Сытость Твоих похвал Дево, благочестивым верным отнюд не бывает: желанием бо желание присно Божественное, и Духовное приемлюще, яко Матерь Божию величаем.

Припев: Пресвятая Богородице спаси нас.

Положил еси нам непостыдную Молитвенницу, Тебе рождшую Христе. Тоя мольбами Милостива подаеши нам Духа, Подателя благодати, от Отца Тобою происходяща.

По катавасии ектенна малая. Таже, Свят Господь Бог наш: трижды.

Посем екзапостиларий утренний.

На хвалитех стихирь воскресны, глас 3:

Стих: Сотворити в них суд написан: * слава сия будет всем преподобным Его.

Приидите вси языцы, / уразумеите страшныя тайны силу: / Христос бо Спас наш, / Еже в начале Слово, / распятыя нас ради, / и волею погребяся, / и воскресе из мертвых, / еже спасти всяческая: / Тому поклонимся.

Стих: Хвалите Бога во святых Его, * хвалите Его в утверждении силы Его.

Поведаша вся чудеса стражие Твои, Господи, / но собор суеты исполни мздою десницу их, / скрыти мняше воскресение Твое, / еже мир славит: / помилуй нас.

Стих: Хвалите Его на силах Его, * хвалите Его по множеству величества Его.

Радости вся исполнишася / воскресения искус приемша: / Мариа бо Магдалина ко гробу прииде, / обрете ангела на камени сидяща, / ризами блистающася и глаголюща: / что ищите живаго с мертвыми: / несть zde, но воста, якоже рече, / предваряя вы в Галилеи.

Стих: Хвалите Его во гласе трубнем: * хвалите Его во псалтири и гуслех.

Во свете Твоем Владыко, / узрим свет Человеколюбче: / воскресл бо еси из мертвых, / спасение роду человеческому даруя: / да Тя вся тварь славословит / Единого Безгрешнаго, / помилуй нас.

Ины стихиры Анатолиевы, глас тойже

Стих: Хвалите Его в тимпане и лице, * хвалите Его во струнах и органе.

Песнь утреннюю мироносицы жены / со слезами приношаху Тебе Господи, / благоухания бо ароматы имуща, / гроба Твоего достигоша, / пречистое тело Твое помазати тщащася. / Ангел седяй на камени тем благовести: / что ищите живаго с мертвыми; / смерть бо поправ воскресе яко Бог, / подая всем велию милость.

Стих: Хвалите Его в кимвалех доброгласных, * хвалите Его в кимвалех восклицания: всякое дыхание да хвалит Господа.

Блестаяся ангел на гробе Твоем животворнем, / мироносицам глаголаше: / истощив гробы Избавитель плени ада, / и воскресе тридневен, / яко Един Бог и Всесилен.

Стих: Воскресни Господи Боже мой, да вознесется рука Твоя, * не забуди убогих Твоих до конца.

Во гробе Тя искаше, / пришедши во едину от суббот Мариа Магдалина, / не обретши же рыдаше с плачем вопиющи: / увы мне Спасе мой! / Украден был еси всех Царю. / Супруг же живоносных ангел внутрь гроба вопияше: / что плачещи О жено; / плачу, глаголет, / яко взяша Господа моего от гроба, / и не вею где положиша Его. / Сия же обратися вспять, / яко виде Тя, абие возопи: / Господь мой и Бог мой, слава Тебе.

Стих: Исповемся Тебе Господи всем сердцем моим, * поведем вся чудеса Твоя.

Евреи затвориша во гробе Живот, / разбойник же отверзе языком наслаждение, / зовый и глаголя: / Иже со мною мене ради распныйся: / сообеси ми ся на древе, / и явися мне на престоле со Отцем седя: / Той бо есть Христос Бог наш, / имеяй велию милость.

Слава, стихира евангельская утренняя.

И ныне:

Преблагословенна еси Богородице Дево, / воплощшим бо ся из Тебе ад пленися, / Адам воззвася, клятва потребися, / Ева свободися, смерть умертвися, и мы ожихом, / тем воспевающе вопием: / благословен Христос Бог благоволивый тако, славо Тебе.

Славословие великое. Таже, тропарь воскресен:

Днесь спасение миру бысть, / поем Воскресшему из гроба, / и Начальнику жизни нашея: / разрушив бо смертью смерть, / победу даде нам, / и велию милость.

И отпуст

НА ЛИТУРГИИ

Изобразительная, блаженна, глас 3:

Отвергша Христе заповедь Твою, праотца Адама из рая изгнал еси: разбойника же щедре исповедавши Тя на кресте, вонь вселил еси, зовуща: помяни мя Спасе, во царствии Твоем.

Стих: Блажени чистии сердцем, яко тии Бога узрят.

Согрешших нас смертною осудил еси клятвою, Живодавче и Господи, телом же Твоим безгрешне Владыко пострадав, смертныя оживил еси зовущыя: помяни и нас во царствии Твоем.

Стих: Блажени миротворцы, яко тии сынове Божии нарекутся.

Воскрес из мертвых, совоскресил еси нас от страстей воскресением Твоим Господи: смертную же всю силу погубил еси Спасе. Сего ради верую Ти зовем: помяни и нас во царствии Твоем.

Стих: Блажени изгнани правды ради, яко тех есть Царство Небесное.

Тридневым Твоим погребением, иже во аде умерщвленныя яко Бог оживотворивый, совоздвигл еси, и нетление всем яко Благ источил еси нам, верую зовущим всегда: помяни и нас во царствии Твоем.

Стих: Блажени есте, егда поносят вам, и ижденут, и рекут всяк зол глагол на вы лжуще Мене ради.

Мвроносицам женам первее явился еси, воскрес из мертвых, Спасе возопив: еже радуйтесь, и теми другом Твоим возвещаеши востание Твое Христе. Сего ради верую Ти зовем: помяни и нас во царствии Твоем.

Стих: Радуйтесь и веселитесь, яко мзда ваша многа на Небесех.

На горе Моисей руце распростер, прообразоваше крест, Амалика победивый: мы же верую того на бесы оружие крепкое приемше, вси зовем: помяни и нас во царствии Твоем.

Слава, Троичен: Отца и Сына, и Духа Святаго воспоем вернии, Единого Бога, Единого Господа, яко от Единого бо Солнца Трисияннаго есть Троица, и просвещает вся зовущыя: помяни и нас во царствии Твоем.

И ныне, Богородичен: Радуйся дворе Божия, Еюже пройде воплощься Создатель, запечатану сохранив Тя. Радуйся облаче легкий, божественный дождь носяй Христа, радуйся Лествице и Престоле Небесный. Радуйся Горо Божия Честная, Тучная, Несекомая.

Прокимен, глас 3:

Прокимен: Пойте Богу нашему, пойте, пойте Цареву нашему, пойте.

Стих: Все языцы воспещите руками, воскликните Богу гласом радования.

Аллилуиа: На Тя Господи уповах, да не постыжуся во век.

Стих: Будь ми в Бога Защитителя, и в дом прибежища, еже спасти мя.